

Morgunblaðið, 20. október 2010

Össur Skarphéðinsson utanríkisráðherra

“Ísland á heima í Evrópu” – Eva Joly

Íslendingar treysta Evu Joly líklega best allra. Kannanir hafa sýnt útbreidda trú Íslendinga á heiðarleika hennar og dómgreind. Hún hefur eytt starfsævi sinni í að berjast gegn spillingu. Sökum starfa sinna hér á landi sem ráðgjafi sérstaks saksóknara þekkir hún vel íslenskar aðstæður, þarfir landsmanna og áhyggjur. Í því ljósi var athyglisvert að heyra hana spurða í Silfri Egils um hvort Ísland ætti að ganga í Evrópusambandið.

Svar hennar var afdráttarlaust: “Já, Ísland á heima í Evrópu.” Innan Evrópusambandsins væri hagsmunum íslensku þjóðarinnar best borgið. Þess ber að geta, að Eva Joly situr á Evrópuþinginu. Hún þekkir því Evrópusambandið út í hörgul og veit hvað hún syngur um hagsmuni Íslendinga.

Eva Joly hefur látið sig auðlindamál Íslendinga sérstaklega varða, einsog samstarf hennar og Bjarkar Guðmundsdóttur varðandi Magma sýndi. Hún veit því af beyg sumra Íslendinga um að aðild að Evrópusambandinu gæti veikt tök okkar á auðlindum. Í augum Evu Joly er það tóm firra að Evrópusambandið ásælist auðlindir okkar, og kallar það bábilju.

Hún var glöggskyggn á þá staðreynd, að þar sem efnahagslögsaga Íslendinga skarast ekki við lögsögur ESB-þjóðanna, myndu Íslendingar ná hagstæðum samningi um fiskveiðar og sjávarútveg. Reglur Evrópusambandsins væru einfaldlega þannig. Þetta er hárrétt. Aðalsamninganefnd okkar er fyrir löngu búin að gera þetta að lykilatriði í málsefnum sínum gagnvart Evrópusambandinu. Engin þjóð getur beitt reglum Evrópusambandsins til að gera rökstudda kröfu um aflaheimildir úr staðbundnum stofnum Íslendinga.

Annað þótti mér þó merkilegra að heyra af hennar munni. Eva Joly er innmúraður lýðræðissinni. Af þeim sjónarhóli benti hún á þá þverstæðu að sumir Íslendingar vilja heldur vera áfram aðilar að EES, þar sem þeir verða möglunarlaust að gleypa hráar reglur sambandsins, án þess að geta haft nokkur áhrif á þær. Sömu menn berjast þó gegn aðild að Evrópusambandinu, þar sem Íslendingar geta þó haft áhrif á þær reglur, sem varða hagsmuni þeirra beint.

Eva benti á, að miklu skynsamlegra væri fyrir Íslendinga að verða aðilar að Evrópusambandinu. Þar geta þeir haft áhrif á þær reglur sem verður að taka upp í íslenskan rétt. “Þið þurfið að vita að innan ESB eru reglur um aðlögun smáríkja einsog ykkar svo þið gætuð í senn orðið hluti af Evrópu og líka haft áhrif á stefnuna”, sagði frú Joly.

Eva Joly vísaði því líka algerlega á bug að fámennar þjóðir gætu ekki haft veruleg áhrif innan Evrópusambandsins. Sjálf tilheyrir hún Græningjum, sem er minnihlutahópur innan Evrópuþingsins. Eva segir að Græningjar hafi áhrif langt umfram þingstyrk. Að sama skapi benti hún á að samstarf Íslendinga við aðrar litlar þjóðir, einsog t.d. Norðurlandþjóðirnar, gætu skilað þeim mikilvægum árangri. Þetta er í stíl við rannsóknir sem hafa sýnt, að í samstarfi verja og sækja smáþjóðir hagsmuni sína saman, og ná ótrúlegum árangri.

Glöggt er gestsaugað. Eva Joly er einlægur Íslandsvinur. Þegar hún segir, að Ísland eigi heima í Evrópusambandinu vegna þess að það þjóni hagsmunum okkar best, þá á íslenska þjóðin að hlusta.